

讀

通

鑑

論

讀通鑑論卷一

船山遺書二十四

衡陽王夫之撰

秦始皇

兩端爭勝而徒爲無益之論者辨封建者是也郡縣之制垂二千年而弗能改矣合古今上下皆安之勢之所趨豈非理而能然哉天之使人必有君也莫之爲而爲之故其始也各推其德之長人功之及人者而奉之因而尤有所推以爲天子人非不欲自貴而必有奉以爲尊人之公也安於其位者習於其道因而有世及之理雖愚且暴猶賢於草野之罔據者如是者數千年而安之矣疆弱相噬而

盡失其故至於戰國僅存者無幾豈能役九州而聽命於此數諸侯王哉於是分國而爲郡縣擇人以尹之郡縣之法已在秦先秦之所滅者七國耳非盡滅三代之所封也則分之爲郡分之爲縣俾才可長民者皆居民上以盡其才而治民之紀亦何爲而非天下之公乎古者諸侯世國而後大夫緣之以世官勢所必濫也士之子恆爲士農之子恆爲農而天之生才也無擇則士有頑而農有秀秀不能終屈於頑而相乘以興又勢所必激也封建毀而選舉行守令席諸侯之權刺史牧督司方伯之任雖有元德顯功而無所庇其不令之子孫勢相激而理隨以易意者其

天子陰陽不能偏用而仁義相資以爲亨利雖聖人其能
違哉選舉之不愼而守令殘民世德之不終而諸侯亂紀
兩俱有害而民於守令之貪殘有所藉於黜陟以蘇其困
故秦漢以降天子孤立無輔祚不永於商周而若東遷以
後交兵毒民異政殊俗橫斂繁刑艾削其民迄之數百年
而不息者亦革焉則後世生民之禍亦輕矣郡縣者非天
子之利也國祚所以不長也而爲天下計利害不如封建
之滋也多矣嗚呼秦以私天下之心而罷侯置守而天假
其私以行其大公存乎神者之不測有如是夫世其位者
習其道法所便也習其道者任其事理所宜也法備於三

王道著於孔子人得而習之賢而秀者皆可以獎之以君子之位而長民聖人之心於今爲烈選舉不慎而賊民之吏代作天地不能任咎而況聖人未可爲郡縣咎也若夫國祚之不長爲一姓言也非公義也秦之所以獲罪於萬世者私已而已矣斥秦之私而欲私其子孫以長存又豈天下之大公哉

孔鮒藏書陳餘危之鮒曰吾爲無用之學知吾者爲友秦非吾友吾何危哉嗚呼能爲無用之學以廣其心而遊於亂世非聖人之徒而能若是乎詩曰握粟出卜自何能穀穀者在我而已何用卜爲屈其道而與天下靡利在而害

亦伏以其道而與天下亢身危而道亦不競君子之道儲
天下之用而不求用於天下知者知之不知者以爲無用
而已矣故曰其愚不可及也秉道以自安慎交以遠物存
黃農虞夏於盜賊禽獸之中奚不可殺而安用卜爲莊周
懲亂世而欲爲散木言無用矣而無以儲天下之大用握
粟憂深而逃羿穀其有細人之情乎知進退存亡而不失
其正易簡以消天下之險阻非聖人之徒其孰與歸
商始興而太甲放周始興而成王危秦并天下而扶蘇自
殺漢有天下而惠帝弗嗣唐則建成死於刃宋則德昭不
令其終汔乎建文之變而精尤烈天下初定人心未靖則

天命以之不康湯武且不能弭後代勿論已然而胡亥殺
兄旋以死亡太甲成王終安其位則伊尹周公之與趙高
相去不但若霄壤也秦始皇之宜短祚也不一而莫甚於
不知人非其不察也惟其好諛也託國於趙高之手雖中
主不足以存況胡亥哉漢高之知周勃也宋太祖之任趙
普也未能已亂而足以不亡建文立而無託孤之舊臣則
兵連禍結而尤爲人倫之大變徐達劉基有一存焉奚至
此哉雖然國祚之所以不傾者無諛臣也

二世

陳嬰之不自立也周市之不王魏也其情均也而周市賢

矣市曰天下昏亂忠臣乃見義之所不敢出害不敢自之
而遠居尊以爲天下不義之魁負且乘致寇至灼然易見
而人不能知非不知也無志義以持其心流俗之蠱之者
進矣陳嬰非幸而有其母亦殆矣哉市之一言所謂大浸
稽天而不溺疾雷破山而不震者乎陳餘自矜儒者而不
能守義以自王周市雖死而如生陳餘碌碌以死又何稱
焉

李斯之對二世曰明主滅仁義之塗絕諫爭之辯犖然行
恣睢之心盡古今賢不肖無有忍言此者而昌言之不
忌嗚呼亦何至此哉斯亦嘗學於荀卿氏矣亦嘗與始皇

謀天下而天下并矣豈其飛廉惡來之所不忍言者而言之不思斯之心其固以爲然乎苟非二世之愚卽始皇之驕恃能受此言而不譴乎斯抑謂天下後世之不以己爲戎首而無所恤乎無他畏死患失之心迫而有所不避耳夫死亦何不可畏也失不可患而亦何必於失也前所以自進者非其道繼所以自效者非其功後所以自保者非其術退所以自置者無其方則失果可患而死果可畏欲無畏無患以不言其所不忍言又奚得乎天下無必死之塗而亦無可幾幸之得正志於早而後無所迫則不忍不敢之心以全早不能圖度於正迫其後失有形死有機雖

欲不爲此言而不得不待上蔡東門之歎肺肝先已白裂
斯豈果無入之心哉易曰履霜堅冰至辨人於早不若自
辨於早也

人皆有不忍人之心而眾怒之不可犯眾怨之不可任亦
易喻矣申商之言何爲至今而不絕邪志正義明如諸葛
孔明而效其法學博志廣如王介甫而師其意無他申商
者乍勞長逸之術也無其心而用其術者孔明也用其實
而諱其名者介甫也乃若其不容掩之藏則李斯發之矣
李斯曰行督責之術然後絕諫爭之路申不害曰有天下
而不恣睢命之曰以天下爲桎梏諍爭絕桎梏脫則雖日

勞於刑名文籍之中而耽酒嗜色佚游驕樂可晏享而不
輟苟未忘逸豫之情者惡能不以此爲兩得之術哉任法
則人主安而天下困任道則天下逸而人主勞無一切之
術以自恣睢雖非求治之主不能高居洗滌於萬民之上
固矣以孔明之淡泊而盡瘁也以介甫之土木其形而好
學深思也然且樂奉名法者何也儉以耳目勤以耳目而
心思從其康逸也賢者且然況令狐綯張居正之挾權勢
者哉使讀李斯之言知其爲導諛勸淫之術也能勿覲然
而汗下與

懷王之立非項氏之意也范增之說以爲從民望而已臣

主之名立而其心不相釋項氏成而懷王固不能有楚懷王念此至悉故一乘項梁之敗而尊上將軍之權以授宋義義適遇其際而獲懷王之心故與計事而大悅非悅其滅秦之計悅其奪項之計也宋義壁於安陽而項羽斬之非憤其救趙之遲憤其奪己之速義之壁安陽而不進也非欲乘秦趙之敝欲得當以收項羽之兵也其遣子相齊而送之無鹽也非不恤士卒之飢寒以自侈爲懷王樹外援於齊而因以自固也宋義死諸將惛然曰首立楚者將軍家也羽之情見矣義之情亦見矣懷王之不能終安於項氏情亦見矣救趙則命宋義入關則命沛公梁死羽孤

爲偏裨於宋義旌牙之下爲懷王謀項者之計得矣而抑
無以服楚人之心幸而秦之君二世也其相趙高也其將
章邯王離也無有能乘臣主之隙以閒楚耳不然雖沛公
且無以自持況義之淺謀羽之徒勇者乎於是而知君臣
之非獨以名爲義也天之所秩性之所安情之所順非是
則不能以終日范增立楚之說董公綰素之謀不足與於
興亡久矣

秦之所殄滅而降辱者六王之後也成之徒之而寡其妻
孤其子者郡縣之民也而剗二世之首欲滅宗室約楚降
而分王關中者趙高也故怨在敵國而敵國或有所不能

怨在百姓而百姓或有所不忍狎及小人而禍必發於小人故曰唯女子與小人爲難養也聖人且難之況中主以降乎小人之心智者弗能測也剛者弗能制也料其必不能而或能之矣料其必不欲而或欲之矣項羽之暴也沛公之明也章邯之怨方新也盡天下欲食高之肉而寢處其皮也使高滅嬴氏之宗開關以講於諸侯豈能免於刀俎而況受納地之封乎則以智者料高而固知其與秦相終始以愚者料高而亦決其與秦同齎粉也然而必弑胡亥以徼幸於一得豈徒胡亥之愚矢入幄而不覺哉明而熟於計者未有謂爲且然者矣禍福之外有無藉之欲焉

死生之外有無方之譎焉俄頃之間有忽變之情焉利亦有所不喻而無所不逞而後君子莫能爲之防故聖人且猶難之誠哉其難之也濡有衣袽終日戒終日者無竟之辭也舍視躬慎微而求馭之之術不墮其阱中者鮮矣

孰謂秦之法密能勝天下也項梁有櫟陽逮斬獄掾曹咎書抵司馬欣而事得免其他請託公行貨賄相屬而不見於史者不知凡幾也項梁楚大將軍之子秦之所尤忌者欣一獄掾馳書而難解則其他位尊而權重者抑孰與禦之法愈密吏權愈重死刑愈繁賄賂愈章塗飾以免罪咎而天子之權倒持於掾史南陽諸劉屢殺人而王莽不能

問皆法密吏重有以蔽之也設大辟於此設薄刑於彼細
極於牛毛而東西可以相竄見知故縱蔓延相逮而上下
相倚以匿姦閭位之主竊非分而寢寢不安藉是以箝天
下而爲天下之所箝固其宜也受天命正萬邦德足以威
而無疚媿者勿效爾爲也寬斯嚴簡斯定吞舟漏網而不
敢再觸梁笱何也法定於一王而獄吏無能移也

通鑑論卷一終

讀通鑑論卷二

船山遺書二十四

衡陽王夫之譏

漢高帝

有天下者而有私財業業然守之以爲固而官天地府萬物之大用皆若與已不相親而任其盈虛鹿麋鉅臺之愚後世開胙之英君皆席以爲常而貽謀不靖非僅生長深宮習奄人汙陋者之過也滅人之國入其都彼之帑皆我帑也則據之以爲天子之私唐克西京而隋氏之有在唐宋入周宮而五代之積在宋蒙古遁而大都之藏輦而之於南畿嗚呼奢者因之以侈其嗜欲儉者因之以卑其志

趣赫然若上天之寶命祖宗之世守在此懷握之金貨而
已矣禍切剝牀而求民不已以自保其私垂至其亡而爲
盜資夫亦何樂有此哉漢王之入秦宮而有豔心見不及
此樊噲曰將欲爲富家翁邪英達之君而見不及噲者多
矣范增曰此其志不在小豈徒一時取天下之雄畧乎以
垂訓後嗣而文景之治幸於盡免天下田租而國不憂貧
數百年君民交裕之畧定於此矣天子而斤斤然以積聚
貽子孫則貧必在國士大夫斤斤以積聚貽子孫則敗必
在家庶人斤斤然以積聚貽子孫則後世必飢寒以死周
有大賚散之唯恐不速故延及三十世而亡之日上無積

宗之慘民亦無凍餒流奪之傷後之王者聞樊噲富翁之
謂尙知懲乎

韓信數項羽之失曰有功當封爵者卽刎傲忍不能予繇
斯言也信之所以徒任爲將而不與聞天下之畧且以不
保其終者胥在是矣封爵者因乎天之所予而隆之非人
主所以市天下也且爵賞亦豈必其足榮哉榮以其難得
而已人主輕之天下獵之人主重之天下榮之宋藝祖許
曹彬下江南授使相彬早知不得而安焉故封爵不侈而
彬服非然則更始之侯林立而不救其亡期於必得之不
足歆也羽不惜屈己以下人而斬天爵何遽非道而必亡

乎漢高天下既定之後侈於封矣反者數起武帝奪之而
六寓始安承六王之做人思爲君而亟予之土地人民以
恣其所欲爲管蔡之親不相保而況他人乎以天下市天
下而已乃爲天子君臣相賢而期報已速固不足以一朝
居矣抑信之爲此言也欲以脅高帝而市之也故齊地甫
定卽請王齊信之懷來見矣挾市心以市主主且窺見其
心貨已讎而有餘怨雲夢之俘未央之斬伏於請王齊之
日而幾動於登壇之數語刀械發於志欲之妄動未有爽
焉者也信之言曰以天下城邑封功臣何所不服爲人主
者可有是心而臣子且不可有是語況乎人主之固不可

以是心而天下乎言不必信行不必果宋祖之慎曹彬之
明保泰居盈之道得之矣奚必踐姑許之言而褻天之景
命哉若夫項羽之所以失者非吝封爵之故信之說不如
陳平之言之允也陳平曰項王所任愛非諸項卽妻之昆
弟雖有奇士不能用故羽非盡不知人有蔽之者也項
羽亞踞膺仕持大權而士惡得不蔽雖然亦有繇爾羽以
詐興者也事懷王而弑之屬宋義而戕之漢高入關而抑
之田榮之眾來附而斬之項奪之積忮害者以己度人而
疑人之忮己輕殘殺者大怨在側而怨不可狎左顧右盼
亦唯是兄弟姻黨之足恃爲援則使輕于人以權已且爲

懷王已且爲宋義惴惴慄慄戈戟交於夢寐抑惡能不厚
疑天下哉然而其疑無救也爲漢王之腹心者項伯也其
兄弟也追而迫之劉者呂馬童也其故人也從之於大敗
之餘者三十餘騎而兄弟姻亞不與焉懷歷求援而終以
孤立非利印不與者甚已而賊之其親戚之叛已久矣不
疚於天則天無不祐不媿於人則人皆可馭正義以行乎
卑道而居天下之廣居無所偏黨而賞罰可以致慎而無
所徇得失之幾在此而不在彼明矣不然舍親賢行誘餌
賤名器以徇游士貪夫之競躁固項羽之所不屑爲者也
名義云者因名以立義爲可繇不可知之民言也不知義

矣爲之名以使之顧而思抑且欲其顧而思而不但名也
況君子之以立民極而大白於天下者哉謂董公說高帝
爲義帝發喪爲漢之所以興者率天下後世而趨於僞必
此言夫忠孝非人所得而勸也如其勸之動其不敢不忍
之心而已心生而後有事事立而後有禮禮行而後有名
名者三累之下天下爲之名而忠孝者不欲自居高帝無
哀義帝之心天可欺乎人可愚乎彭城之敗幾死幾亡而
編素之名不能爲之救則塗飾耳目以故主復讎之名無
當於漢之興明矣雖然以此正項籍之罪使天下恥戴之
爲君長也則有餘何也籍者平氏之世臣也援立義帝者

項梁之以令諸侯者也劉氏世不臣於楚其屈而君懷王也項氏制之耳高帝初無君懷王之心則可不哀懷王之死爲天下而討弑君之賊非人弑己君而有守官之責者也故發喪之後高帝亦終不挾此以令天下而數羽之罪不嫌以背約不王已於秦爲首則董公之說亦權用之一時而高帝亦終不以信諸心嗚呼貌爲君子者日言心而以名爲心日言義而以名爲義告子惡得不以義爲外而欲戕賊之乎秦滅六國互相噬而強者勝耳若其罪莫甚於侈周楚幸不亡於秦而楚且爲秦非其世臣非其遺胄抑何必戴楚以爲君戴楚者項氏之私義也漢亦何用引

項氏之義以爲己義乎此義不明但有名而卽附諸義焉
李嗣源史奇也名爲唐而唐之李昇不知其爲誰氏之子
也名爲唐而又唐之有名而無義名爲義而義不生於心
論史者之亂義久矣中國立極之主祖考世戴之君明明
赫赫在人心而不昧臣子自有獨喻之忱行其不敢不忍
者而豈但以名哉

毒天下而以自毒者其唯貪功之人乎酈生說下齊齊已
受命而漢東北之慮紓項羽右臂之援絕矣黥布盜也一
從漢背楚而終不可叛況諸田之耿介可以保其安枕於
漢也亡疑乃韓信一啟貪功之心從蒯徹之說疾擊已降

而酈生烹懸下之軍喋血盈野諸田卒以殄其宗慘矣哉
貪功之念發於隱微而血已漂鹵也龍且亦猶是也軍於
高密客說以深壁勿戰令齊王招散民反漢而歸己漢客
兵不容於久聞而必潰敗以全三軍奠楚勢而保齊豈不
賢於浪戰以死亡乎且則曰救齊不戰而降之吾何功雖
其後勝敗不同而且之心亦信之心也信以其毒毒齊而
齊民駢死田氏以亡且以其毒自毒而濰水涌流楚軍大
覆田氏不救舉人之宗社人民存亡生死之大而不滿忤
人之谿壑毒螫人而蠶蠶亦死信幸破齊以自請王齊而
未央之誅已伏於此且亦以其身斃於濰水之上然則貪

功而毒人亦自讎其項領而速之斯也悲哉愚不可瘳已
李左車下全燕而燕不叛隨何收九江而黥布無疑善用
人者亦何利有貪功之人以賊天下而多其讐哉漢雖有
齊而力已疲楚覆救齊之兵而項王大懼恃人不黜而能
定天下未之有也

韓信下魏破代而漢王收其兵與張耳破趙而漢王又奪
其兵何以使信帖然聽命而抑不解體以颺去哉此漢王
之所以不可及也制之者氣也非徒氣也其措置予奪之
審有以大服之也結之者情也非徒情也無所偏任無所
聽熒可使信坦然見其心也吾之所爲無不可使信知之

矣信固知己之終爲漢王倚任而不在軍之去留也故其
視軍之屬漢也無以異於己無疑無怨何所靳而生其枝
甚乎假使奪信軍而授之他人假使疑信之反而奪其軍
以防之項王一印之利而信叛三軍之重豈徒一印之予
奪乎心不可使人知者以柔用之而敗以剛用之而速亡
有所偏聽怙黨而疑人者不能制之而死於其人能制之
而其人速叛以去武王曰予有亂臣十人同心同德十人
之同乎武王武王同之也

漢王甫破項羽還至定陶卽馳奪韓信軍天下自此亂矣
大敵已平信且攤彊兵也何爲故無所挾以爲名而抗不

聽命既奪之後弗能怨也如姑緩之使四方卒有不虞之事有名可據信兵不可奪矣奪之速而安以奠宗社以息父老子弟以斂天地之殺機而持征伐之權於一王乃以順天休命而人得以生且信始不從蒯徹之言與漢爲難者項未亡也參分天下鼎足而立蒯徹狂惑之計耳昔者韓嘗以此持天下之縱橫然吞於秦而不救其覆軌矣信反於齊則張耳掘其西彭越控其南鼎足先折而徒爲天下蠱賊信知其不可而拒徹計之深也項王滅漢王倦歸於關中信起而乘之乃可以得志徹之說信豈須臾忘哉卞莊子小死大斃一舉而兩得之術俟時而發發不旋踵

矣其曰不忍背漢者姑以謝徹耳削王而侯國小而無兵
尙欲因陳豨以發難擁三齊之勁旅西嚮而虎視尙誰忌
哉或曰宋太祖之奪藩鎮也類此而又非也信者非石守
信高懷德之儔也割地而王據屢勝之兵非陳橋擁戴之
主也故宋祖懲羹吹齋而自弱漢高拔本塞源以已亂迹
同而事異其權不在形迹之間也

漢王初卽皇帝位未封子弟功臣而首以長沙王吳芮
粵王無諸此之謂大畧二子者非有功於滅項者也追原
破秦之功而封之以天下之功爲功而不功其功此之謂
大公楚漢爭於北而南方無事久於安則亂易起立王以

鎮撫之此之謂制治於未亂以項羽宰天下不公爲罪而討之反其道而首錄不顯之績此之謂不遺遺得尙於中行若此者內斷之心非閭侯所得與況蕭何陳平之小智乎量周天下者事出於人所不慮若迂遠而實協於人心此之謂不測

秦項已滅兵罷歸家何其罷歸之易而歸以卽乎安古者兵皆出於農無無家者也罷斯歸矣漢起巴蜀三秦之卒用九江齊趙之師不戰其地不擾其人無閭井之怨歸斯安矣後世召募失業之民欲歸而無所歸則戰爭初息而道歸之也難善師古者旁通而善用之則漢抑有民相聚

山澤不書名數者復其故爵田宅教訓而優恤之之詔是
可爲後世師者也無所侵傷於民而禁其仇殺非有官爵
田里而爲之授以隙地寬假以徭役而命爲稍食之胥卒
以此散有餘之卒熟計而安存之奚患亡術哉高帝甫一
天下而早爲之所國不糜農不困兵有所歸下令於流水
之源而條委就理不謂之有大畧也得乎

以大義服天下者以誠而已矣未聞其以術也奉義爲術
而義始賊義者心之制也非天下之名也心所勿安而忍
爲之以標其名天下乃以義爲拂人之心而不利順於理
夫高帝當窘迫之時豈果以丁公爲可殺而必殺之哉當

誅丁公之日又豈果能忘丁公之免已而不以爲德哉欲
懲人臣之叛其主而先叛其生我之恩且置然曰是天下
之公義也則借義以爲利而吾心之惻隱亡矣夫義有天
下之大義焉有吾心之精義焉精者純用其天良之喜怒
恩怨以爲德威刑賞而不雜以利者也使天下知爲臣不
忠者之必誅而畏卽於刑乃使吾心違其恩怨之本懷矯
焉自誣以收其利然則義爲賊仁之斧而利之圖也乎故
赦季布而用之善矣足以勸臣子之忠矣若丁公者廢而
勿用可也斬之則導天下以忘恩矣恩可忘也苟非刑戮
以隨其後則君父罔極之恩孰不可忘也嗚呼此三代以

下以義爲名爲利而恃其天良之大慝也

畱侯欲從赤松子遊司馬溫公曰明哲保身子房有焉未足以盡子房也子房之言曰家世相韓爲韓報讎身方事漢而暴白其終始爲韓之心無疑於高帝之如其忘身以伸志也光明磊落坦然直剖心臆於雄猜天子之前且曰願棄人間事從赤松子遊視漢之爵祿爲鴻毛而非其所志忠臣孝子青天皎日之心不知有榮辱不知有利害豈嘗逆億信之必夷越之必醢而厘以全身哉抑惟其然而高帝固已喻其志之貞而心之潔矣是以舉太子以託之而始終不忤嗚呼惟其誠也是以履虎尾而不疚卽不幸

而見疑有死而已矣弗能內懷忠而外姑爲佞也曹操之
甚毒也徐庶懷先主之知終始不與謀議而操無能害況
高帝之可以理感者乎若夫未忘故主而匿情委曲以避
患謝靈運之所以身死而名辱本自江海人忠義感君子
孰聽之哉

中國夷狄之禍自冒頓始冒頓之闖入句注保太原自韓
王信之叛降如信失韓之故封而徙於太原其欲甘心於
漢久矣請都馬邑近塞而易與胡通數使之胡求和陽爲
漢和而陰自爲降地畜不逞以假手於冒頓不待往降之
日而早知其志在胡矣非韓信則冒頓不逞非石敬瑭則

邪律氏不橫求如郭子儀與吐蕃回紇有香火緣而無貳心者今古無兩人然則以狡焉不逞之彊帥置之邊徼未有不決隄焚林以殘剽內地者也飢鷹獠犬不畜之樊圉而軼之颺飛爨走之地冀免禍於目前而首禍於千古甚哉高帝之偷也

魯兩生責叔孫通興禮樂於死者未葬傷者未起之時非也將以爲休息生養而後興禮樂焉則抑管子衣食足而後禮義興之邪說也子曰自古皆有死民無信不立信者禮之幹也禮者信之資也有一日之生立一日之國唯此大禮之序大樂之和不容息而已死者何以必葬傷者何

以必順此敬愛之心不容昧焉耳敬焉而序有必順愛焉而利有必浹動之於無形聲之微而發起其莊肅樂易之情則民知非苟於得生者之可以生苟於得利者之可以利相恤相親不相背棄而後生養以遂故晏子曰唯禮可以已亂然則立國之始所以順民之氣而勸之休養者非禮樂何以哉譬之樹然生養休息者枝葉之榮也有序而和者根本之潤也今使種樹者曰待枝葉之榮而後培其本根豈有能榮枝葉之一日哉故武王克殷駕甫脫而息賁革之射修禋祀之典成象武之樂受命已末制作未備而周公成其德不曰我姑且休息之而以待百年也秦之

苛嚴漢初之簡畧相激相反而天下且成乎鄙倍舉其大綱以風起於崩壞之餘亦何遽不可而非直無不可也非是則生人之心生人之理日頽靡而之於泯亡矣唯叔孫通之事十主而面諛者未可語此耳則苟且以背於禮樂之大原遂終古而不與於三王之盛使兩生者出而以先王安上治民移風易俗之精意舉大綱以與高帝相更始如其不用而後退未晚也乃必期以百年而聽目前之滅裂將百年以內人心不靖風化未起汲汲於生養死葬之圖則德色父而諄語姑亦誰與震動容與其天良而使無背死不葬捐傷不恤也哉衛輒之立亂已極矣子曰禮樂

不與則刑罰不中民無所措手足務本教也漢初亂雖始
定高帝非輒比也輒可與而謂高帝不可兩生者非聖人
之徒與何其與孔子之言相刺謬也於是而兩生之所謂
禮樂者可知矣謂其文也非其實也大序至和之實不可
一日絕於天壤而天地之產中和之應以瑞相祐荅者則
有待以備乎文章聲容之盛未之逮耳然草創者不爽其
大綱而後起者可精又奚必人之嫻於習而物之給於用
邪故兩生者非不知權也不知本也

蕭何曰天子以四海爲家非壯麗無以示威其言鄙矣而
亦未嘗非人情也游士之屢集於公卿之門非其必能貴

之也蔬果之饋集於千金之室非必其能富之也釋老之
宮飾金碧而奏笙鐘媚者削伏以請命非必服膺於其教
也莊麗動之耳愚愚民以其榮觀心折魂勞而戢其異志
抑何爲而不然哉特古帝王用之之懷異耳古之帝王昭
德威以柔天下亦既灼見民情之所自戢而納之於信順
已奏九成於闢丘因以使之知天崇宗廟於七世因以使
之知孝建兩觀以縣法因以使之知治營靈臺以候氣因
以使之知時立兩階於九穀因以使之知讓卽其歆動之
心迪之於至德之域視之有以懼其目聽之有以盈其耳
登之降之進之退之有以詒其安然後人知大美之集集

於仁義禮樂之中退而有以自極非權以誘天下也至德
之榮觀本有如是之洋溢也賢者得其精意思不肖者矜
其聲容壯麗之威至矣哉而特不如何者徒以宮室相誇
而已不責何之弗修禮樂以崇德威而責其弗儉徒以儉
也儉於欲亦儉於德蕭道成之鄙吝遂可與大禹並稱乎
國無貴人民不足以興國無富人民不足以殖任子貴於
國而國愈偷賈人富於國而國愈貧任子不能使之弗貴
而制其貴之損賈人不能使之弗富而奪其富之驕高帝
初定天下禁賈人衣錦綺操兵乘馬可謂知政本矣嗚呼
賈人者暴君汙吏所亟進而寵之者也暴君非賈人無以

供其聲色之玩汙吏非賈人無以供其不急之求假之以
顏色而聽其輝煌復何忌哉賈人之富也貧人以自富者
也牟利易則用財也輕志小而不知裁智昏而不恤其安
欺貧儒以矜夸而國安得不貧民安得而不靡高帝生長
民間而習其利害重挫之而民氣蘇然且至孝文之世后
服帝節如賈生所譏則抑末崇本之未易言久矣

婁敬之小智足以動人主而其禍天下也烈矣遷六國後
及豪傑名家居關中以爲強本而弱末似也遣女嫁匈奴
生子必爲太子諡以禮節無敢抗禮而漸以稱臣以爲用
夏而變夷似也眩於一時之利害者無不動也乃姑弗與

言違生民之性就其說以折之敬之說惡足以逞哉富豪
大族之所以彊者因其地也諸田非勃海魚鹽之利不足
以彊屈昭景非雲夢澤陂之資不足以彊世家非姻亞之
盛朋友之合小民之相比而相屬不足以彊棄其田里違
其宗黨奪其所便拂其所習驅旅寓食於關中土著之閒
不十年而生事已落氣餒沮喪曹子桓云客子常畏人諒
矣或畏人者尙能自彊以爲國彊邪固不如休息餘民而
生聚之也故貧民尙可徙也舍其瘠土而移其餘俗可使
彊也豪傑大族摧折凋殘而日以衰聚失業怨咨之民於
塗轍之下弱則靡而悍則懟豈有幸乎而當時之爲虐甚

矣匈奴之有餘者猛悍也其不足者智巧也非但其天性然其習然也性受於所生之氣習成於幼弱之時天子以女配夷臣民狃而不以爲辱夷且往來於內地而內地之女子婦於胡者多矣胡雖雜母之氣而狎其言語駐戾如其父慧巧如其母益其所不足以佐其所有餘故劉淵石勒高歡宇文黑獺之流其狡獪乃浚操懿而駕其上則禮節者徒以長其文姦之具因以屈中國而臣之也有餘而進臣中國哉凡斯二者皆敬之邪佞以此破之將孰置喙而徙民之不仁和親之無恥又不待辨而折者也

陳稀之反常山郡亡其二十城周昌請誅其守尉高帝曰

是力不足亡罪守尉視屬城之亡而不效其死力昌之請誅正也雖然有辨寇自內發激之以反反而不覺覺而匿不以聞不爲之備不亟求援則其誅勿赦也無疑寇自外發非其所激非所及覺覺而兵已壓境備而不給待援不至其窘也無疑故立法者無一成之法而斟酌以盡理斯不損於國而無憾於人陳豨之反非常山之所能制而能早覺者也故周昌之按法不如高帝之原情雖然止於勿誅而已矣其人不可復用也所謂近死之心不可復陽也叔孫通之諫易太子也曰臣願伏誅以頸血汙地烈矣哉夫抑有以使之然者高帝之明可以理喻也呂后之權足

恃也。留侯四皓之屬爲之羽翼而詭隨者，憚高帝而不敢
競也。通知必不死，卽死而猶有功，何憚而不爭？嗚呼！以面
諛事十餘主之通而犯顏骨梗也，可使如此。上有明君，下
有賢士大夫，倭者可忠，柔者可疆，天下豈患無人材哉？匪
上知與下愚，未有不待獎而成者也。

惠帝

曹參因蕭何之法而治，非必其治也。唯其時之不得不因
也。高帝初崩，母后持權於上，惠帝孱弱而不自振，非因也。
抑將何爲哉？魯兩生曰：「禮樂百年而後興。」唯惠帝之時，言
此爲宜。爾周公之定禮也，流言未靖，東郊未定，商奄未殄。

不逮及也參非周公之德而值其時乃欲矯革創之失以
改易一代之典則人心不置而亂卽於此起易於益之初
曰利用爲大作元吉无咎元吉而後无咎利者非其利也
風淫於上而雷迅於下其吉難矣夫飭大法正大經安上
治民移風易俗有本焉有末焉有質焉有文焉立綱修紀
撥亂反正使人知有上下之辨吉凶之則者其本也緣飾
以備其文章歸於允協者其末也末者非一日之積也文
者非一端之飾也豫立而不可一日緩者其本質也俟時
而相因以益者其末文也高帝之時不可特也而兩生之
說非矣無以植其本則後起者無藉也而錮人心風俗於

簡畧慢易之中待之百年而民俗益偷雖有其志而無其
徵雖有其主而無其臣故迄乎武帝僅得董仲舒之疏漏
而曲學阿世之公孫宏者且進也不足以有爲矣此高帝
不夙兩生不出之過也惠帝曹參之時不可不因也有周
之遺文六國之遺老雖有存者可與釐定蕭何之法叔孫
通之禮以折衷三代昭示來茲而母后悍權姦張內難且
作更張未幾而禍發於中勢將指創制顯庸爲豐端天下
抑且以修明制作爲戒其弊也詩書道圯俗學苟容人心
趨靡粹倫日斂漸漬以益流爲偷薄所必然矣嗚呼方正
學死而讀書之種絕於天下則漢之猶有賈董臧紕以存

古道於百一者非曹參有以養之乎故唯曹參者可以因也時也前此而爲高帝當敦其質後此而爲文景必致其文時也兩生傲而不出文景讓而不遑遑乎時遑乎道矣語曰明王有道守在四夷制治保邦之道至矣書曰迪惟有夏乃有室大競競以德也非競以兵也詩曰邦畿千里惟民所止民所止也非兵所聚也易萃之象曰除戎器戒不虞萃聚二陽於四五而分四陰於上下陽文德也陰武功也近九五者陽而屏陰於外內文教而後不虞以戒矣漢聚勁兵於南北軍而兵積彊於天子之肘腋以是爲競王室鞏邦畿戒不虞之計焉然天子豈能自將之哉必委

之人而人不易信則委之外戚委之中官以爲暱我而可
無虞者乃呂祿掌北軍呂產掌南軍呂后死且令據兵衛
宮以遂其狂逞而劉氏幾移於呂其後竇梁何進與中官
迭相握符而恣誅殺以脅天子者喋血相仍卽其未亂也
人主之廢立國事之措置一聽命於大將軍而丞若其
府史使利器不操於其手則三公九卿持清議於官之
上而孰敢恣睢以逞乎天下散處而可以指臂使者也兵
者衛四夷而聽命於帥者也近在肘腋而或掣之矣周勃
侂得而成竇武侂失而敗人主贅立於上而莫必其操縱
則亦危矣唐當天寶之前無握禁兵於輦轂者故撲二張

諸武如縛雞之易借曰不競然且安史犯闕而旋踵以平
貞元以後魚朝恩吐突承璀王守澄劉季述所挾以驕而
廢主弑君如吹枯而振槁其所恃者豈非天子所欲聚以
自競之兵乎垂及五代郭氏據於前趙氏奪於後不出郊
關而天下以移究所以禦夷裔而除盜賊者又不藉此也
則天子未能有兵聚兵以授人之亂而已邊徼之備不修
州郡之儲不宿耀武於法宮明堂之側舍德而欲以觀兵
棄器而欲以衛勇天子之服天下豈以左矛右戟遙震遐
方而使轡乎唯兵在外而守在夷也則內賊奄宦遙遠而
不相及利不足以相啖威不足以相灼恍然畏天下之議

其後而無挾以爭卽有逆臣猝起以犯順亦互相牽曳而終以潰敗推而大之舜禹之舞干而三苗效順亦惟不與天下競勇而德威自震胥此道焉耳矣嗚呼聚兵於王室以糜天下於轉輸祇以召亂而弗能救亡豈非有天下者之炯戒哉

文帝

誠以安君之謂忠直以正友之謂信忠信爲周君子周而上下睦天下留矣周勃平諸呂迎立文帝而有德色非有罔上行私之愆也不學無術而忘其驕耳袁盎與俱北面事君尊卑雖殊固有同寅之義規而正之勃豈遽詰而不

改藉其不改而後廷折之勃過不捥而文帝之怒亦釋矣
乃弗規弗折而告文帝曰丞相驕陛下謙讓臣主失德斯
言出而釁忌生勃之禍早伏而不可解險矣哉帝之謙非
失德也尊有功而禮大臣亦何非太甲成王之盛心而導
之以猜刻此之謂不忠諫其心之無他弗與規正而行其
讒間此之謂不信盜之險詖推刃疊錯而奪之權於勃先
之矣小人之可畏如此夫乃抑有姦不如盜者淺而躁褊
迫而不知大體擊於目卽騰於口貽禍臣主追悔而弗及
非盜類而害與盜等故人主之宜遠躁人猶其遠姦人也
則親親尊賢之道其全矣乎

易曰謙亨君子有終君子而後有終非君子而謙未有能終者也故撝也鳴也勞也而終之以侵伐雖吉无不利而固非以君子之道終矣君子之謙誠也雖帝王不能不下邱民以守位雖聖人不能不下芻蕘以取善理之誠然耆殫心於此而誠致之天下見爲謙而非有謙也而後可以有終故讓誠也任亦誠也堯爲天下求賢授之舜而不私丹朱與禹之授啟湯之授太甲武王之授成王一也皆誠也舜受於堯啟受於禹與泰伯之去句吳伯夷之逃孤竹一也皆誠也若夫據謙爲柄而撝之而鳴之而勞之則姑以此謝天下而不自居於盈則早已有填壓天下之心而

禍機伏而必發故他日侵伐而无不利黃老之術離誠而
川爲久矣取其鳴謙之辭驗其侵伐之事心跡違初終實
抑將何以自解哉故非君子未有能終其謙者也有司請
建太子文帝詔曰楚王季父也吳王兄也淮南王弟也諸
父昆弟之懿親宜無所施其僞者而以觀其後吳濞楚戊
淮南長無一全其軀命者尺布斗粟之謠取疚於天下而
不救然則詔之所云以欲翕固張之術處於謙以利用其
忍亦險矣哉且夫言者機之所自動也吳楚淮南聞斯語
而欲動其妄心則雖欲撲之而不得故曰火生於木而焚
生火之木自生而自剋也文帝亦何利焉至於侵伐而天

下亦殆矣君子立誠以修辭言其所可行行焉而無所避使天下洞見其心而鬼神乎之兵革之萌銷於心而機不復作則或任焉而無所用謙或讓焉而固誠也非有偽而託於鳴者也何侵伐之利哉

漢興至文帝而天下大定賈誼請改正朔易服色定官名興禮樂斯其時矣魯兩生百年而後興之說謬矣雖然抑豈如誼之請遽興之而遂足以興邪武帝固興之矣唐元宗欲興之矣拓拔氏宇文氏及宋之蔡京亦皆欲興之矣文帝從誼之請而一旦有事於制作不保其無以異於彼也於是而興與不興交錯以凋喪禮樂而先王中和之極

遂斬於中夏夫誼而誠欲興也當文帝之世用文帝之賢
導之以中和之德正之於非僻之萌養之以學問之功廣
之以仁義之化使涵泳於義理之深則天時之不可逆而
正朔必改人事之不可簡而服色官名之必定至德之不
可敷而禮樂之必興恍惕而不安於其心若倦於遊而思
返其故抑且有大美之容至和之音髣髴於耳目之間而
迫欲遇之則以文從質以事從心審律呂於鈇象之間考
登降於周旋之際一出其性之所安學之所裕以革故而
鼎新不待歷歲年而燦然明備矣誼之不勸以學而勸以
事則亦詔相工瞽之末節方且行焉而跛倚聞焉而倦卧

情文不相生焉足以興故文帝之謙讓誠有歉於此也固
帝反求而不容自誣者也禮樂不待興於百年抑不可遽
興於一日無他惟其學而已矣或曰成王幼冲德未成而
周公亟定宗禮何也曰周公之自定之也非成王之能也
迨其後成王曰就月將而緝熙於光明乃以用周公之所
制而不慙誼固非周公藉令其能如周公而帝以黃老之
心行中和之矩範自願其不類而思去之又奚能以終日
乎

文帝罷衛將軍軍不欲使兵之冗集於京師也罷太尉官
屬丞相不欲兵柄輕有屬也合將與相而一之故匈奴侵

上郡而灌嬰以丞相出將以是爲三代文武同塗之遺制
與抑論之罷衛軍罷太尉未嘗不宜也天子者不待擁兵
以爲威假待之以爲威則固不可更授其制於一人乃若
合將相於一而卽相以將則固不可灌嬰者可將者也非
可相者也其可相者則又非可將者也故三代之制不可
行於後世者有二農不可兵兵不可農相不可將將不可
相也且夫古之將相合一者列國之事爾楚之令尹楚之
帥也晉之將中軍晉之相也所以然者何也列國無議禮
制度考文之事無百揆四門大麓之典其執政者不必有
變陰陽興教化敍刑賞之任而其爲帥也亦鄰國之不輯

相遇於中原以一矢相加遺而猶有禮焉非如後世之有天下者與夷狄盜賊爭社稷之存亡也其謂之將相者今一郡之倅判而已又其小者一縣之簿尉而已若天子則吉甫山甫方叔南仲各任其任而不相攝然則三代且不然而況後世統萬方之治亂司邊徼之安危者乎蓋相可使之御將而不可使爲將將可與相並衡而不可與六卿並設宋之以樞密司兵而聽於相庶幾近之矣以樞密總天下之戎務而兵有專治以宰相司樞密之得失而不委以專征斟酌以倣三代之遺意而因時爲節宣斯得之與開臣督師而天下速斃嗚呼殆矣夫

齊食其之死文帝傷淮南王長之志赦而弗治亦未爲失也漢廷之大臣無有敢請治之者國無人矣張釋之爲廷尉雖在食其已死之後而追請正邢侯雖子之刑抑非事遠而不可問姑市其直於太子梁王之行馳道而緘口於淮南則其直也蓋見可知難之直畏彊禦而行於所可伸者也天子屈於情而廷臣挫於勢故其後王安欲反而謂漢廷諸臣如吹枯振落之易其政侮於諸侯久矣張釋之其尤乎

以一人之譽而召季布以一人之毀而遣季布天下將窺其淺深雖然何病人主威福之大權豈以天下莫能窺爲

不測哉布之悻悻於罷去而仰詰人主以取快其不足以
爲御史大夫明矣使酒難近之實自露而不可掩矣文帝
之失輕於召布也非輕於罷布也慎用太臣而不吝於改
過聞人之言遲之一月而察其非諛默然良久而曰河東
吾股肱郡故特召君所以養臣子之恥也非慙也如其慙
邪抑以輕於召布而媿其知人之不夙也

賈誼陸贄蘇軾之三子者迹相類也贄與軾自以爲類也
人之稱之者亦以爲類也贄蓋希誼矣而不能爲誼然有
愈於誼者矣軾且希贄矣而不能爲贄況乎其猶欲希誼
也奚以明其然邪誼之說豫教太子以端本樂廉隅以善

俗費弗逮焉而不但此傅梁懷王王墜馬斃誼不食死費
弗能也所以知其不能者與竇參爲難之情勝於憂國也
顧誼之爲學猶而不純幾與費等而任智任法思以制刳
奴削諸侯其三表五餌之術嬰稚之巧也其削吳楚而益
齊私所親而不慮貽他日莫大之憂是僕妾之智也費之
所勿道也故輔少主嬰孤城仗節守義以不喪其貞者費
不如誼而出入紛錯之中調御輕重之勢斟酌張弛以出
險而經遠也誼不如費是何也誼年少憤盈之氣未履艱
屯而性之貞者畧恆疏則本有餘而末不足斯誼與費輕
重之衡有相低昂者矣若夫軾者惡足以頡頏二子乎酒

肉也佚遊也情奪其性者久矣寵祿也禍福也利勝其命者深矣志役於雕蟲之技以聳天下而矜其慧學不出於揣摩之術以熒天下而讎其能習於其父儀秦鞅斯之邪說遂欲以攬天下而生事於平康之世文飾以經術而自曰吾誼矣詭測夫利害而自曰吾贊矣迷失其心而聽其徒之推戴且曰吾孟子矣俄而取道於異端抑曰吾老聃矣吾墨子矣若此者誼之所不屑抑贊之所不屑也絳灌之非誼曰擅權粉亂於誼爲誣於軾允當之矣藉授以幼主危邦懸足以知其所終哉乃欲推而上之列於誼與贊之間宋玉所云相者舉肥也王安石之於誼似矣而誼正

誼之於方正學似矣而正學醇正學凌誼而上之且不能以戢禍亂而幾爲咎首然則世無所求於己己未豫圖其變端居臆度而欲取四海而經營之未有能濟者也充誼之志當正學之世盡抒其所蘊見諸施行殆可與齊黃並驅乎贊且不能而軾之淫邪也勿論已故抗言天下者人主弗用而不足惜惟贊也能因事納忠則明君所銜勒而使馳驅者也

文帝除盜鑄錢令使民得自鑄固自以爲利民也夫能鑄者之非貧民貧民之不能鑄明矣姦富者益以富樸貧者益以貧多其錢以斂布帛菽粟紵漆魚鹽果蓏居贏以持

貧民之緩急而貧者何弗日以貧邪耕而食桑苧而衣洿池而魚鼈罔牢而牛豕伐木藝竹而材貧者力以致之而獲無幾富者雖多其隸傭而什取其六七焉以視鑄錢之利相千萬而無算卽或貸力於貧民而雇值之資亦僅耳抑且仰求而後可分其波潤焉是驅人聽豪右之役也故先王以虞衡司山澤之產而節之使不敢溢於取盈非吝天地之產限人巧使爲上私利也利者公之在下而制之在上非制之於上而可云公也推此義也鹽之聽民自煮茶之聽民自煎上勿問焉亦名美而實大爲羹糗也茶之利猶夫耕之粟而奚爲於天下或曰鹽可謚

不可曰古之耕也以助今之耕也以貢助以百畝爲經貢
以千畝爲卒法祀於兼井而仍存其故茶之於民也非賴
以生而業也制於粟而不制於茶卽有廬山之勞而亦均
於運木故法林之稅二十而五先王不以爲苛惡在一王
之上食地之力可任狡民之舍稼穡以多所營而不爲之
裁制邪卽求以勸耕獎樸而禁姦煮海種山之不可聽民
自擅而泥錢之利坐收逸獲以長豪黠而奔走貧民爲國
發蠹者乎金銀鉛錫之礦其利倍蓰於鑄錢而爲爭奪之
費端乃或爲之說曰聽民之自採以利民弄兵戕殺而不
爲禁人亦何樂乎有君

鑄錢輕重之準以何爲利曰此利也不可以利言也而利莫有外焉矣如以利則榆莢纒纒尙矣穀雜鉛錫者尙矣然而行未久而日賤速敝壞而不可以藏故曰此利也不可以利言也且夫五穀絲苧材木魚鹽蔬果之可爲利以利於人之生而貴之也金玉珠寶之僅見而受美於天也故先王取之以權萬物之聚散然亦曰以是爲質可以致厚生之利而通之非果以爲寶而人弗得不寶也然旣僅有僅見而因天地自然之質也銅者天地之產繁有而人習賤之者也白人制之範以爲錢遂與金玉珠寶爭貴而制衆用材疏之生死然且不精不重則何弗速敝壞而爲

天下之所輕其唯重以精乎則天物不替而人功不偷猶可以久其利於天下故長國家者知天人輕重之故而勿務一時詭得之獲一錢之費以八九之物力人功成之利亦未有既也即使一錢之費如一錢焉而無用之銅化爲有用通計初終而多其貨於人間以饒益生民而利國國之利亦溥矣一錢之費用十之八九則盜鑄無利而止錢一出於上而財聽命於上之發斂與萬物互相通以出入而有國者終享其利故曰不以利言而利莫有外也則五銖之輕不如開元之重殺雜鉛錫不如金背漆背之情通計之而登耗盈虛之數見非淺人所易知也以苟且偷俗

之情與天地之德產爭美利未有能勝者也

淮南王長反形已具丞相御史奏當棄市正也所謂人臣無將將則必誅者也文帝赦而徙之與蔡叔郭鄰之罰等臣子法仲而天子之恩紀不漸長憤悲不食而死怙終賊刑免於討足矣袁盎請斬丞相御史儉人之心不可窮詰有如此者或者其欲以恩私外市諸侯而背天子挾莊助外交之心以冀非望未可知也抑或憎妒大臣之軋己而欲因事驅逐以立威於廷而擢人位未可知也文帝避殺弟之名置盎不譴而參用其說盎之無憚以逞而欺景帝迫龍錯而陷之死終執兩端與吳漢交市而言之不衷也

顯矣。蓋故俠也。俠者之心故不可致詰者也。有天下而聽任俠人其能不亂者鮮矣。

嗚呼。自漢以後。治之不古也。有自矣。太甲高宗成王之姿。非必其軼文帝而上之。然而伊尹之訓。傳說之命。周公之告曰。無安厥位。惟危。曰。不惟逸豫。惟以亂民。曰。所其無逸。未嘗貶道以誘之。易從也。豈其如賈生之言曰。使爲治勞志慮。苦身體。乏鐘鼓之樂。勿爲可也。樂與今同。而欲立經陳紀。爲萬世法。斯其爲言去李斯之言也。無幾何也。以法術制天下。而情以恬嬉。則其法雖異於秦之法。而無本以立威於末。勞天下。而以自豫。能以是一朝居乎。使天下而

可徒以法治而術制焉裁其衣服而風俗卽壹修其文辭而廉恥卽敦削奪諸侯而政卽咸統於上則夏商法在而桀紂又何以亡夫文帝而幸非縱欲偷樂之主也其未免於田獵鐘鼓之好而姑以自逸未有以易之耳得醇儒以沃乃心浸灌以道義之腴建中和而興王道諸侯奚而不服風俗奚而不移廉恥奚而不崇而先導諛以冀讎其說文帝幸不爲胡亥耳文帝而胡亥誼雖欲自異於李斯也不能乃後世或猶稱之曰善誘其君以興治下惡得有臣上惡得有君哉

賈生之論教太子本論也雖然尤有本焉士庶之子杯酒

之耽博弈之好奪其欲而教之且反唇曰夫子未出於正
矣況天子之子淫聲曼色交於前婦人宦寺羅於側欲有
與導淫有與宣爲君父者忘志慮之勞憚身體之苦逐鐘
鼓馳驅之樂徒設嚴師以閑之於步履拜揖之間使其聽
也一偶人之威儀耳成帝穆穆皇皇而淫荒以滋亂況其
聞風志蕩徒怨君父之我奪而思快於一旦乎成王幼而
武王崩無所取儀型也則周公詠豳風陳王業之艱難作
無逸舉前王之乾惕遙立一文武以爲之齔亦惟文武之
果可以爲齔而後周公非徒設以冀其觀感如其以逸樂
爲德以法術爲治以聲音笑貌爲道以師保傅之諄諄爲

教此俗儒之徒以苦人而父子師友之間相蒙以僞曾不如文帝之身治黃老術而以授其子之足使信從也故賈生之論非立教之本論也

等賢而上之則有聖人等貴而上之則有天子故師一善者希聖之積也敬公卿大夫者尊王之積也此陛尊廉遠堂高之說也郡縣之天下夷五等而天子孤高於上舉羣臣而等夷之賈生所以有戮辱太迫大臣無恥之歎焉嗚呼秦政變法而天下之士廉恥泯喪者五六矣漢僅存之唐宋僅延之而訖不能延之洪武興思以復之而終不可復誠如是其笞辱而不忤矣奚望其上憂君國之休戚下

畏小民之怨謫乎身爲士大夫俄加諸膝俄墜諸淵習於
訶斥歷於桎梏衣以受隸投之凌踐既使之隱忍而幸
於得生則清議之譏非在沒世而非卽唾其面詛呪之作
在窮簷而不敢至乎其前又奚不可之有哉雖然爲士夫
夫亦有以致之矣肅何出獄而仍相周勃出獄而仍侯不
能禁上之不以囚隸加己而何不可禁己之無侯以相也
北寺之獄廷杖之辱死諍之臣弗避焉忠也免於獄不死
於杖沾沾然自以爲榮而他日復端笏垂紳於堂堊是亦
不可以已乎如鄒爾瞻之復爲九卿也於虧體辱親之罪
奚避焉人主曰是嘗與囚隸同撻繫而不以爲恥者也是

惡足改容而禮乎上弗獎之下安受之下既安之上愈賤之仁宗之寬厚李祭酒之剛直且荷按而不能引退斯則賈生所宜痛哭者也

子之於父母可寵可辱而不可殺身者父母之身也故寵辱聽命而不慙至於殺則父母之自戕其生父不可以爲父子不能免焉子不可以爲子也臣之於君可貴可賤可生可殺而不可辱刑賞者天之所以命人主也貴賤生死君卽逆而吾固順乎天至於辱則君自處於非禮君不可以爲君臣不知媿而順承之臣不可以爲臣也故有盤水加劍聞命自弛而不可捽抑臣之異於子天之秩也人性

之順者不可逆健者不可屈也賈生之言以動文帝而當時之大臣抑有聞而媿焉者乎微直當時後世之詔獄廷杖而向被章服以立人之朝者抑有媿焉者乎使詔獄廷杖而有人自裁者人君之辱士大夫尚可懲也高忠憲曰辱大臣是辱國也大哉言乎故沈水而逮問之禍息魏忠賢且革其凶威況人主哉

漢初封諸侯王之大也去三代未遠民之視聽猶習於封建之舊而怨秦之孤故勢有所不得遽革也秦政李斯以破封建爲萬世罪而賈誼以諸侯王之大爲漢痛哭亦何以異於孤秦而論者若將黥刑秦而揖進賈生以坐論數

十年之間是非之易如水火甚矣夫論史者之惛惛也誼之言曰衆建諸侯而少其力以爲是殆三代之遺制也與三代之衆建而儉於百里非先王故儉之也故有之國不可奪有涯之宇不可擴也且齊魯之封徵之詩與春秋傳皆踰五百里亦未嘗狹其地而爲之防也割諸王之地而衆建之富貴驕淫之子童心未改皆使之南面君人坐待其陷於非辟以易爲禡爵此陽子陰奪之術於骨肉若仇讎之相逼而相縻以術誼之志亦矣以異於嬴政李斯而秦陽也誼陰也而誼慤矣漢之割地以王諸侯承三代之餘不容驟易然而終不能復者七國亂於前秦革於後將

滅之鐙餘一燄其勢終窮可以無煩賈生之痛哭卽爲漢
謀亦唯是鞏固王室修文德以靜待其自定無事恍然以
驚也乍見封建之廢而恍然驚乍見諸侯之大而恍然驚
庸人之情不參古今之理勢而唯目前之駭未有不賊仁
害義而啟禍者言何容易哉至其論淮南之封侯而憂白
公子胥縛諸荆軻之事則周公之封蔡仲也曰爾尙益前
人之愆將亦憂蔡仲刺刃以衝成王之胷乎於是而誼之
刻薄寡恩不可揜矣淮南之終叛也皆以爲誼言之中也
誼昌言於廷曰安且爲白公子胥而安能無以白公子胥
爲志哉然則淮南之叛誼導之矣淮南王長之廢國法也

其子受封親親之仁也淮南終得國而長猶然文帝之弟
安猶然文帝之從子白公子胥也乎哉不引而親之顧推
爲讎而慮之以殺機往者以殺機報爲天子司天下之生
殺口取天下而慮其讎蔑不讎矣甚哉誼之不聞道而祇
爲術也

賈誼畏諸侯之禍議益梁與淮陽二國之封互江河之界
以制東方何其言之自相背盤也誼曰秦日夜苦心勞力
以除六國今高拱以成六國之勢則其師秦之智以混一
天下不可揜矣乃欲增益梁淮陽而使橫互於江河之間
今日之梁淮陽卽他日之吳楚也吳楚制而梁淮陽益驕

而使橫互於江河之間以塞漢東鄉之戶孰能禦之哉己
之昆弟則親之信之父之昆弟則疑之制之逆於天理者
其報必速吾之子孫能弗以梁淮陽爲蠹蠱而讎之乎夫
封建之不可復也勢也雖然習久而變者必以其漸秦惟
暴裂之一朝而怨滿天下漢畧師三代以建侯王而其勢
必不能久延無亦徐俟天之不可回人之不思返而後因
之七國之變未形遽起而翦之則亦一秦也封建之在漢
初鎧炬之光欲滅而姑一耀其燄智者因天仁者安土俟
之而已誼操之已蹙而所爲謀者抑不出封建之殘局特
一異其迹以緩目前爾繇此言之則誼亦知事之必不可

以百年而姑以憂貽子孫也封建之盡革天地之大變也非仁智不足以與於斯而誼何爲焉

鼂錯徙民實邊之策偉矣寓兵於農之法後世不可行於腹裏而可行於塞徼天氣殊而生質異地氣殊而習尚異故滇黔西粵之民自足以捍蠻苗而無踰嶺以窺內地之患非果蠻苗弱而北狄彊也土著者制其吭則深入而畏邊民之搗其虛也雖然有未易者焉沿邊之地肥磽不齊徙而授以瘠壤不逃且死者寡吏失其人綏撫無術必反而爲北狄用此二患者輕於言徙必達其咎而實邊之議遂爲永戒錯之言曰相其陰陽之和嘗其水泉之味始事

之不可不密也地誠饒矣雖有山谿之險且置之爲甌脫而移塞於內無憂也我所不得居亦彼所不能據也若夫吏人之得失在人而不在法然法善以待人則人之失者鮮矣後世之吏於邊者非羸貧無援之乙科則有過遷補之茸吏未有能入而爲臺諫郎官者未有擢而爲監司郡守者以日暮塗窮衰颯之心而僅延簪紱之氣能望其憂民體國而固吾圉哉若擇甲科之選移守令課最之賢者以爲之吏寬其法制俾盡其材以拊循而激勸之輕徭賦以安之通商賈教樹畜以富之廣學宮之選以榮之寵智能豪雋之士以勵之則其必不爲北狄用以乘中國之釁

者可以保之百年邊日以疆而坐待狄之自敝故曰錯之言偉矣特其曰絕匈奴不與和親其冬來南壹大治則終身創矣此則未易言也非經營於數十年之久未能效也羈縻以和親而徐修實邊之策或不待大治而自不敢南犯其不悔禍而冒昧以逞與大治之無慮其不克矣

入粟而拜爵免罪黽錯之計亦未失也其未爲失計也非謂爵可輕而罪得以貨免也謂其可以奪金錢之貴而授之粟也輕齎折色有三易焉官易收吏易守民易輸三易以趨苟簡之利便而金奪其粟之貴則情使民勞於輸官勞於收吏勞於守而勿徇其便此參數十世而能純成其

利非俗吏之所知也雖然入粟六百石而拜爵上造一家之主伯亞旅力耕而得六百石之贏餘者幾何無亦彊豪挾利以多占役人以佃而收其半也無亦富商大賈以金錢籠致而得者也如是則重農而農益輕貴粟而金益貴處三代以下欲抑彊豪富賈也難而限田又不可猝行則莫若分別自種與佃耕而差等以爲賦役之制人所自占爲自耕者有力不得過三百畝審其子姓丁夫之數以爲自耕之實過是者皆佃耕之科輕自耕之賦而佃耕者倍之以互相損益而協於什一之數水旱則盡蠲自耕之稅而佃耕者非極荒不得輒減若其果能躬親勤力分任丁

壯多墾厚收饒有贏餘乃聽輸粟入邊拜爵免罪而富商大賈居金錢以斂粟及疆豪濫占佃耕厚斂多畜者不得與如此則得金之貴而還之粟可十年而得也充錯之說補錯之未逮任牧民於良吏嚴拜爵免罪之制於畫一乃不窒礙而行遠不然輸粟之令且變而爲輕齎折色天下益汲汲於金鑄徒以亂刑賞之大經爲敗亡之政而已矣肉刑之不可復易知也如必曰古先聖王之大法以止天下之惡未可泯也則亦君果至仁吏果至恕井田復封建定學校興禮三王而樂六代然後復肉刑之辟未晏也不然徒取愚賤之小民折割殘毀以唯吾制是行而曰古先

聖王之大法也則自欺以誣天下惜孰甚焉抑使教養道盡禮樂復興一如帝王之世而肉刑猶未可復也何也民之仁也則以百年必世而猶必三代遺風未斲之日也風未移俗未易犯者繁有而毀支折體之人積焉天之所不祐也且也古未有笞杖而肉刑不見重今旣行笞杖而肉刑駭矣故以曹操之忍而不敢嘗試況不爲操者乎張蒼之律曰大辟論減等已論而復有笞罪皆棄市嚴矣雖然固書所謂怙終賊刑者也故詳刑者師文帝之詔張蒼之令可也

漢有殺人白告而得減免之律其將導人以無欺也與所

惡於欺者終不覺而讎其慝也夫既已殺人矣則所殺者
之父兄子弟能訟之所司能捕獲之其惡必露勢不可得
而終匿也而惡用自告爲小人爲惡而揜蔽於君子之前
與昌言於大廷而無忤赦也孰爲猶有恥乎自度律許減
免而覬覦漏網者從而減之則明張其殺人之膽而惡乃
滔天匿而不告者鼠也告而無諱者虎也教鼠爲虎欲使
天下無欺而成其無忌憚之心將何以懲故許自告者所
以開過誤自新之路而非可以待凶人凶人而自匿民彝
其猶有未教不較蹉乎

什一之賦三代之制也孟子曰重之則小桀輕之則小貉

言三代之制也天子之畿千里諸侯之大者或曰百里或曰五百里其小者不能五十里有疆場之守有甲兵之役有幣帛饗殽牢飭之禮有宗廟社稷牲幣之典有百官有司府史胥徒祿食之眾其制不可勝舉聘義所云古之用財者不能均如此是已故二十取一而不足然而有土地中地下地之差有一易再易萊田之等則名什一而折衷其率亦二十而取一也自秦而降罷侯置守矣漢初封建其提封之廣蓋有倍蓰於古王畿者而其官屬典禮又極簡畧率天下以守邊而中邦無會盟侵伐之事若郡有守縣有令非其伯叔甥舅之交而饋問各以其私社稷粗立

而祀典不繁一郡之地廣於公侯之國而掾史郵徼曾不足以當一鄉一遂之長合天下以贍九卿羣司之內臣而不逮周禮六官之半是古取之一圻而用豐今取之九州而用儉其他國家之經費百不得一也什一而征將以厚藏而導人主之宣欲乎不然亦奚用此厚斂爲也文帝十三年除田租稅景帝元年復收半租三十而稅一施及光武之世兵革旣解復損十一之稅如景帝之制誠有餘而可以裕民也封建不可復行於後世民力之所不堪而勢在必革也

漢文短喪而孝道衰於天下乃其繇來有漸也先王權衡

恩義之精意相沿以晦而若強天下以難從也禮曰事親
致喪三年事君方喪三年方也者言乎其非致也嗣君之
喪致喪也外而諸侯內而公卿大夫方喪也苟其爲方喪
則郊可攝社稷五祀可祭會盟征伐可從事於臣也奚病
弟子之喪師也羣居則經出則否以意通之然則臣爲君
喪有事焉而攝吉以行可矣昏禮之辭曰三族之不虞君
不與焉則冠昏且得行矣天地社稷越紼而行事則祭固
不廢矣文帝之詔曰損其飲食絕鬼神之祭祀以重吾不
德蓋秦有天下尊君已侈禁天下以嚴制天下之飲食絕
其祭祀失先王之精義而溢分以爲物情之難堪非三代

之舊也抑文帝之詔統吏民而壹之則無差等也禮有之
諸侯爲天子斬衰帷諸侯也公士大夫之眾臣爲其君斬
衰布帶繩屨傳曰近臣君服斯服矣是從服也非近臣則
殺矣庶人爲國君齊衰三月國君云者對在國之民而言
於天子則畿內之民也不施及天下明矣統天下之臣民
禁其嫁娶祠社飲酒食肉皆秦之苛法也秦統而重之文
帝統而輕之皆味分殊之等而禮遂以亡唯夫嗣君者雖
天子固子也達於庶人性之無可數一也同姓之諸侯王
爵則古諸侯也自漢以下無民事焉無兵事焉尤其可伸
者也宰輔以下至於外吏之卑者一也皆臣也吉凶雜用

推布帶纆屨之禮而通焉特非泣視則降采而素焉可矣
郡縣之天下無內外之殊通庶人三月之制施及天下可
矣唯是諒闇之禮舉兵戎刑賞之大政皆總已以聽於冢
宰抑有難行於今者非但冢宰之難其人而僭亂爲憂也
古之天子所治者千里之畿爾四夷之守藩衛任之疆臣
內擅諸侯得而問罪焉外內相制而諸侯之生死予奪非
朝廷所得意爲恩威則冢宰亦不得以意亂之郡縣之天
下統四海之治總萬方之賦兼四裔之守監司守令刑賞
聽命而莫有恆經是非交錯恩威互致冢宰孰敢以一身
任之非但無伊周之德也與百僚同拔於貢舉資格之中

望自不足以相泣也故欲行商周之制伸孝子之情定天下之志體先王之精意而無有弊非窮理盡性以適時措之宜者未易言也沿三代之遺文於殘闕之後矯羸政之過而不內反諸心外揆之時達於事之無不可遂則文帝之短喪遂以施行於萬世而有志者莫挽不亦悲乎夫文帝猶有古之遺意也已下棺服大功十五日小功十四日纖七日未葬以前固皆斬衰也禮天子七月而葬虞祔卒哭將已期矣期而小祥古有受服焉大功小功者受服之變也纖禪服也雖短之猶未失古之意而促已甚文帝以己亥崩乙巳葬合而計之四十三日耳景帝速葬而速除

不懷甚矣以日易月非文帝之制也愈趨而愈下也

文帝崩年四十有六閔三年而吳王濞反濞之令曰寡人年六十有二則其長於文帝也十有三年當文帝崩濞年五十有九亦幾老矣詐病不覲反形已著賈誼鼂錯日晝策而憂之文帝豈不知濞之不可銷弭哉賜以几杖而啟豐無端更十年而濞卽不死亦以衰矣趙楚四齊庸劣無大志濞不先舉弗能自動故文帝籌之已熟而持之已定文帝幸不卽崩坐待七國之瓦解而折箠以收之是誼與錯之憂文帝已憂之而文帝之所持非誼與錯所能測也吉凶之消長在天動靜之得失在人天者人之所可待而

人者天之所必應也物長而窮則必消人靜而審則可動故天常有遞消遞長之機以平天下之險阻而恆苦人之不相待智者知天之消長以爲動靜而恆苦於躁者之不測其中之所持若文帝者可與知時矣可與知時殆乎知天矣知天者知天之幾也夫天有貞一之理焉有相乘之幾焉知天之理者善動以化物知天之幾者居靜以不傷物而物亦不能傷之以理司化者君子之德也以幾遠害者黃老之道也降此無道矣庸人不測恃其一鱗之知物方未動激之以動激之以動而自詫爲先覺動不可止毒遂中於天下而流血成渠國幸存而害亦慘矣嗚呼謀人

家國者可不慎哉自非桀紂必有懷來有一鬴之知者禎
密以俟之毋輕於言而天下之禍可以息

讀通鑑論卷二終